

## Nai' Paulus in surat ahunut neu apirsait ein abitan Tesalonika 1 Tesalonika

### *Tabe ma haan buseet*

<sup>1</sup> Haan tabes na'ko au, nai' Paulus kau, ma au partein nai' Silas ma nai' Timotius.

Surat re' ia, hai msoun ee neu ki arki too srani' et kota Tesalonika. Hi es re' ampiir kiim ranan he mituin hit Ama' Uisneno, ma mituin hit Usi' Yesus Kristus.

Hai mtoit Uisneno he nakrira' In nekan reok goe neu ki, he hi mmoni mbi mamut, rame' es nok es, ma tainina'.<sup>☆</sup>

### *Nai' Paulus antoit makasi, natuin abitan Tesalonika npirsain piut*

<sup>2</sup> Hai misaeb makasi piut-piut meu Uisneno, natuin hi pirsait naan. Fai-manas hai m'onen ma mteek ki ok-oke'. <sup>3</sup> Hai mimnau piut-piut meu are' mepun re' hi mmoe' sin, natuin hi mpirsai Uisneno ma mneek Ee. Hi mtahan piut-piut ambi are' mepun naan, natuin hi mharap ma mifnekan meu Usif Yesus. Hai meik sin piut-piut meu Uisneno In human ma In matan, re' hit Ama'.

<sup>4</sup> Aok-bian arki! Hai mihiin mak Uisneno nneek ki. Etun In npiir ma nbeit naan ki njair In nonot-asar. <sup>5</sup> Neon goes ii, oras hai iim meu

---

<sup>☆</sup> **1:1** Haef ein sin Reta' 17:1

Tesalonika, hai mitoon ki Uisneno In Rais Reko. Oras naan, hi mneen hai uab ein rek-reko. Hi ka mneen ahaa fa, mes hi miit kiim Uisneno In kuasan amsa' na'ko In Asmaan Akninu'. Rasin re' naan, es re' anmoe' ki ma hi mtoup Usi' In Rais Reko batuur-batuur. Oras naan, hi miit meik hi matam, hai 'tokom ma hai 'naom mak, hai mmoe' on mee, he hi mihiin batuur-batuur Usi' In ranan. <sup>6</sup> Natuin hi mroim ma mpiir he mituin Uisneno In romin, es naan ate hi mmoin mituin hai 'tope', ma mmoin mituin Usif Yesus In a'tope'. Mes oras hi mtoup Rais Reko, nmui' tuaf re' nasusab ki. Maski on naan amsa', hi neekm ein naan ka na'oin ein fa, natuin Uisneno In Asmaan Akniun' ee, nfee ki neek marinet.☆

<sup>7</sup> Nok ranan naan, hi mikrira' 'tope' meu apirsait ein ok-oke' abitan propinsi Makedonia ma propinsi Akaya. <sup>8</sup> Mes ka re' naan anmees fa. Uisneno In Rais Reko naan nasiin on ma nanaob on na'ko ki hi abit Tesalonika naan, antea mee-mee. Onaim hai he mi'uab saa' antein, natuin biak ein oke' anneen anrair hi neek pirsait meu Uisneno. <sup>9</sup> Anbi mee-mee jah, biak ein nareet ein nak, unu' te hi mtoup kai nok rek-reko. Rarit hi mait imporin hi fuat ein naan, ma mi'te'un hi neekm ein naan ma mituin Uisneno re' amneot ma ammonot. Natuin hi re' naan of amjair Uisneno Amonit Iin ja ki. <sup>10</sup> Sin imsa' nareet ein nak, hi fe' mpa-pao Uisneno In Anah, Nai' Yesus, he nkoen On neem na'ko sonaf neno tunan. Neon goes ii, biak ein na'maet Je, mes Uisneno namonib nafain' Ee. Karu Uisneno nroim he nhukun mansian ii te, Usif Yesus es re' of ansoi

---

☆ **1:6** Haef ein sin Reta' 17:5-9

nafetin naan kit na'ko to'os Uisneno.

## 2

### *Nai' Paulus namnau in mepu nbi Tesalonika*

<sup>1</sup> Aok-bian arki! Hi arki mihiin, oras hai iim ma mmepu mbi Tesalonika te, hai ka mporin fa hai suus-haet naan ruum-ruum. <sup>2</sup> Hi mimnau msa', oras hai ka iim fa fe' ambi kota Tesalonika te, abitan kota Filipi sin nasusab ma nha'mu'i nrair kai. Mes Uisneno nha'tain kai, he hai mibrain he mitoon Uisneno In Rais Reko meu ki, maski too mfaun ein anmusun kai.✧ <sup>3</sup> Oras naan, hai meik Rais Reko meu ki mbi kota Tesalonika, hai ka meik fa noni' re' neik ki neu raan amre'ut. Hai ka iim fa he miboo, ai' mputa-kriu ki.

<sup>4</sup> Oras naan, hai iim nok neek akninu' ma mne'o. Uisneno neikn On anruur ma nreek kai, he hai meik Rais Reko meu ki. Hai ka mroim fa he mhariin mansian ii in nekan, mes hai mroim he mhariin Uisneno In nekan, natuin In es re' ansuu' hai neekm ein nak, namneo ai' npeun.

<sup>5</sup> Hi mihini msa' mak, hai ka mkopo' ki fa, saa' antein he maim ranan he mipein roit na'ko ki. Uisneno nahiin nain hai neekm ein. <sup>6</sup> Hai mmepu msa', ka neu fa he mipein bo'is na'ko mansian, ai' na'ko ki, ai' na'ko biak ein. <sup>7</sup> Hai re' ia, Kristus In haef ein. Hai mmui' hak he mmoe' jom on re' a'naet ein, mes hai ka neu he maiks om fa on re' naan. Oras naan, hai mmoe' jom on re' ri'ana' re' natua nok ki.\* Hai mikrira' msa' rais manekat meu ki, on re' bifee asusu' ri'ana'.

---

✧ **2:2** Haef ein sin Reta' 16:19-24, 17:1-9 \* **2:7** Suur Akninu' uab Yunani antui mnak *νεπίοι* (*neipioi*) "ri'ana' kru'uf". Ma tuis bian antein nak *εἰπιοι* (*eipioi*) "neek manura".

<sup>8</sup> Hai ka iim fa neu haa he mfee ki Rais Reko, mes hai mnona' ki hai tuam ein ii ok-oke', natuin hai mneek miis ki.

<sup>9</sup> Aok-bian arki! Hi of mimnau fe' amsa', hai mmeup fai-manas nok ma'tani', he hai mitaah ma misaah kiim hai 'monim naan. Hai ka misusab ki fa, oras hai meik Rais Reko naan meu ki. <sup>10</sup> Hi arki miit ma msaksii, ma Uisneno njair saksii msa' nak, oras hai mok ki apirsait ein abitan bare naan, hai mmoin nok neek akninu' ma mne'o, ma ka mmoe' fa sanat mese' msa'.

<sup>11</sup> Hi mihiin mak, hai m'urus ki ok-oke' on re' aam honi' n'urus in aanh ein, <sup>12</sup> es re' hai mha'tain hi neekm ein, mimnaub ki nok rasi huma'-huma', ma mfuir ki, he hi mmoin nok reko ma mharineb Uisneno In nekan. Fin In re' anjair Usif, es re' no'en ki he mtaam amjair In nonot-asar, ma mipein sapaaf ambi In pinan ma krahan amsa'.

*Uisneno nmeup et hi neekm ein*

<sup>13</sup> Hai misaeb makasi ka natfeek niit fa meu Uisneno, natuin oras hi mneen Rais Reko naan mi'ko kai, hi ka mtoup fa mansian ii in uaban, mes hi mneen ma mtoup Uisneno In Uaban. In es re' neikn On anmepu mbi hi neekm ein naan sin naank ein.

<sup>14</sup> Aok-bian arki! Hi fe' mmurai mituin Uisneno In ranan, mes hi aom-bian sin re' hi mok sin pah mese', nasusab ki. Nok ranan naan, hi mnaben miit amsa' mok apirsait ein propinsi Yudea, re' sin napenin susat ma ha'mu'it na'ko sin atoin Yahudis kuuk, natuin sin npirsain neun Yesus Kristus.✧

---

✧ **2:14** Haef ein sin Reta' 17:5

15 Anmui' atoin Yahudis re' ka ntoe natuin fa Uisneno In romin. Etun oras Uisneno nreek haefan In mafefa kniun' ein neman neu sin ite, sin nasusab ma nha'mui' sin, ma na'maet sin. On naan amsa', sin na'maet Usif Yesus. Oras ia, sin namin ranan he ntitar napoitán kai nteín. Sin nmusun nok sekau-sekau goah. Natuin are' kanan rasin naan, etun Uisneno ka nroim sin fa. ✧  
 16 Rais jes antein, sin nmo'en ekat huma'-huma', he hai kais meik Uisneno In Rais Reko ia meu tuaf ambi pah bian antein. Atoin Yahudis sin ka nromin fa he Usi' nsoi nafetin tua 'teta'. Nok ranan naan, sin ntao sin saant ein na'unu' ma na'tuup ok piut. Etun Uisneno natoo' ma nhukun sin.

*Nai' Paulus anroim he nateef nok apirsait ein abitan Tesalonika antein*

17 Aok-bian arki! Maski oras ia hit tmaka'roon, mes hit neek ein kais on re' naan. Hai maim oras, he karu reko te, hai mfain iim amtein he miteef mok ki, natuin hai mimnau ki re'-re'uf. 18 Au kuuk, au 'soba' ufan-fain he 'eit i'kius ki, mes niut reu'f ein sin a'naakt ee, n'eka' kau piut. 19 Hi mihiin mak, nansaa' am es hai he iim amkius ki? Hai he iim, natuin hai mharap ma mifnekan meu ki. Hi es re' mhariin ma mi'naeb hai neekm ein. Fin sekau nteín es re' nnaa' naher-heran Usif Yesus In kanan, karu ka hi fa! Karu hit Usi' ankoen On anfain neem, hai mibei' he mi'aiti' hai 'naakm ein, natuin hi raism ein naan. 20 Batuur! Hi es re' mi'naeb hai neekm ein ma mhariin kai.

---

✧ 2:15 Haef ein sin Reta' 9:23,29, Haef ein sin Reta' 13:45,50, Haef ein sin Reta' 14:2,5,19, Haef ein sin Reta' 17:5,13, Haef ein sin Reta' 18:12

### 3

*Nai' Paulus nafeek he nreek nai' Timotius he nnao neu Tesalonika*

<sup>1-2</sup> Hi mihini te, noo goah! Neon goes ii, oras hai misaitan ki mbi naan, ka natuik ma natai fa nok hai romim. Hai neekm ein anmariin anmaten he iim amkius ki, mes ka njair fa. A'roo-'roo te, hai ka mibe'i mtein fa goen, etun hai mifeek he mreun nai' Timotius neit inkius ki. Mes au 'ok nai' Silas mibaar ambi kota Atena. Nai' Timotius naan, hai aom-bian. In re' naan, hai partei ja nbi mepu re' hai mibua oras hai minaob Yesus Kristus In Rais Reko. Hai mreek ee neit he in nanoni' ki ma nha'tain ki, he hi rais pirsait meu Uisneno naan na'kii' ma naheer antein. <sup>3</sup> Nok ranan naan, karu hi mipein susat, hi neekm ein naan ka na'oin ein fa. Ampooh ma mnaa' miher-heran hi rais pirsait naan. Fin hi mihiin mak, apirsait ein neun Kristus, ro tebes of napenin susat on re' naan. <sup>4</sup> Neon goes ii, oras hai mok ki fe', hai mimnaub main ki mmak, tuaf-tuaf re' npirsai neu Usif Yesus, of napenin susat huma'-huma'. Oras ia, are' kanan susat naan, anjarin nrarin, ai' on mee?

<sup>5</sup> Natuin au 'susa 'maet 'ok hi 'tokom ma hi 'hakem, es naan ate au 'reek nai' Timotius neit neu Tesalonika, maut he hai mipein hanaf nak, hi mpirsai piut fe' meu Uisneno, ai' kaah. Natuin au neek ii nabait imsa', kais-kaisa' niut reu'f ein sin a'naak kou' goe neem ma nfuir ki he hi maikoit Uisneno. Karu njair on naan ate, hai mepu neno naan, ruum am parsuum!

---

☆ **3:1-2** Haef ein sin Reta' 17:15

*Nai' Timotius nfain neem ma neik hanaf na'ko  
apirsait ein abitan Tesalonika*

<sup>6</sup> Oras ia, nai' Timotius anfain neem een na'ko Tesalonika, ma neik hanaf re' nhariin kai. In nareet am nak, hi mpirsai piut meu Kristus, ma mmaneek piut. Rarit in natoon am nak, hi mimnau kai msa', on re' hai mimnau ki.☆

<sup>7-8</sup> Aok-bian arki! Maski hai abit ia mnaben ma'fena' natuin hai mipein susat huma'-huma' ka kre'-re'o fa, mes nai' Timotius in neik rais haan maut batuur-batuur neu kai. Natuin rasi naan, oras ia hai mihiin mak, hi mpirsai Uisneno piut-piut ma mmafuut reko mok Ne.

*Nai' Paulus an'onen anteek too srani' abitan  
Tesalonika*

<sup>9</sup> Onaim hai misaeb sukuur makasi kou'-ko'u meu Uisneno nok neek marine, natuin hi mituin Ee piut. <sup>10</sup> Hai m'onen fai-manas, he reko te, hit arkit bisa tateef attein. Hai he minoni' minokab ma mimtisib meu ki Uisneno In raan a'honis.

<sup>11</sup> Hai mharap ma mifnekan hai teenb ii meu hit Ama' Uisneno, ma hit Usi' Yesus Kristus, re' anfei ranan, he hai iim miteef mok ki mtein.

<sup>12</sup> Hai mtoit he Uisneno nmepu nbi hi neekm ein he hi rais maneekt aan nanaob on piut. On naan amsa', mok hi aom-bian sin ok-oke', on re' hai mneek ki msa'. <sup>13</sup> Nok ranan naan, Uisneno nha'tain ki, he mmoin nok neek amne'o ma kninu', tar antea Usif Yesus ankoen On anfain neem nok Iin na, hi mhaek mok amsa' ambi hit Ama Uisneno In human ma In matan, ma hi ka misaah ma mroi meik fa sanat mese' msa'.

---

☆ **3:6** Haef ein sin Reta' 18:5

## 4

*A'monit re' anharineb Uisneno In nekan*

<sup>1</sup> On nai, aok-bian arki! Hai mtoit ma mi'paen meu ki, he hi mmoin ma mharineb Uisneno In nekan, on re' hai minoni' ki oras naan. Batuur, hi mmoin mituin sin oek' een, mes natuin hit ttaam atjair nonot-asar teu Usif Yesus, es naan ate, hai mtoit ki he hi maim ranan ma'tani' ntein. <sup>2</sup> Hi arki mihini mrair saa'-saa' re' hai minoni' ki sin, ampaek Usif Yesus In kuasan. <sup>3</sup> Uisneno In roimn ii on nai: ammoni kninu'! Kais am'oemeet. Tait i'tope' on re': kais ammakaek ma mmakoin karu ka fee-mone fa. <sup>4</sup> Hi ro he m'ator mihiin hi tuam ein kiim he mmoni kninu', tar antea biak ein anhormaat ki.\* <sup>5</sup> Kais ammoin mituin hi tenab amre'ut re' anpoi na'ko hi neekm ein naan, on re' biak ein re' ka nahiin fa Uisneno. <sup>6</sup> Kais anmui' tuaf re' he niis anmees kuun ma naim ranan he narukib apirsait ein neu Uisneno. Natuin Uisneno naan, hit Usi' re' of anbaras amreu't ein ok-oke'. Rasin re' ia, hai mitoon sin neu ki fani-fani, ma mimnaub main ki sin na'ko oras unu' naan. <sup>7</sup> Fin Uisneno no'en anrair kit he tjair Iin na. In sairt ii, hit ro he tmoni te, takninu', ka t'oemeet, ka on fa tuaf-tuaf re' anmakonin rafu'-rafu'. <sup>8</sup> Nok rasi naan, sekau-sekau re' ka natuin fa noni' ia, in ka npenan kai fa, mes in npenan Uisneno re' anfee nrair In Asmaan Akniun' ee neu ki.

---

\* **4:4** Uab Yunani in uab tuka' ia nak, "Hi ro he mkikin hi σκεῦος (*skeuos*) 'bare' kiim". Kata σκεῦος (*skeuos*) re' ia, biasa te, in a'moufn ii nak 'bare', 'aok', ai' 'tuak'. Mes bian nak anbi era' re' ia, *skeuos* in a'moufn ii nak 'fee'. Nok ranan naan, era' re' ia in a'moufn ii bisa nak, "mmoni kninu' mok ho fee".

<sup>9</sup> Anbi au teenb ii te, au kais a'tui ufani' 'eu ki rasi re' anmatoom nok rais manekat anbi hi apirsait bare naan, natuin Uisneno neikn On nanoni' ki mnak, hi ro he mmaneek es nok es. <sup>10</sup> Hai mneen amrair mak, hi mneek hi aom-bian sin abitan propinsi Makedonia naan. Mes aok-bian arki! Oras ia, hai mtoit ki, he hi mmaneek amtein mok tuaf bian amsa'. <sup>11</sup> Maim ranan he hi 'moinm ein mamut, rame' es nok es, ma tainina'. Kais amseit-seitn om meu biak ein sin rasin, mes es-es ate m'urus kuum ho rasi. Hi ro he maim mepu-re'ot he mipeni mnahat natuin hi maskeet aa kuum. Kais amharap ma mifnekan meu biak ein. Rasi ia hai mimnaub ee meu ki na'ko neon goes ii. <sup>12</sup> Karu hi mmoin on re' naan ate, hi ka misaeb fa ma'fena' meu biak ein. Of tuaf-tuaf re' ka npirsain fa neun Kristus niit hi 'moinm ein on naan ate, sin nak, "Aijoo! Apirsait ein neu Usif Yesus, sin a'moink ein mne'o batuur!"

*Rasi re' anmatoom nok Usif Yesus he nkoen On anfain neem*

<sup>13</sup> Oras ia, aok-bian arki! Au he utoon ki rais jes, maut he hi mihiin batuur anmatoom nok amaets ein. Hit arkit tahiin tak, amaets ein of anmonin nfanin. Onaim karu anmui' tuaf na'ko Usif Yesus lin na nmaten, hi kais misusab hi tuam ein naan, on re' biak ein re' ka nahiin fa nak, amaets ein of anmonin nfanin. <sup>14</sup> Natuin hit tahini trair tak, Nai' Yesus anmaet, mes rarit Uisneno namonib nafain' Ee. Onaim karu on naan ate, of Uisneno namonib nafani' are' amaets ein amsa' re' anpirsai nrarin, ma nabuaba' sin nok Usif Yesus.

<sup>15-17</sup> Karu Usif Yesus ankoen On anfain neem, In nsaun neem na'ko sonaf neno tunan neu

pah-pinan, of anmui' hanaf re' naprenat nok ma'tani'. Rarit ameupt ein sonaf neno tunan sin a'naakt ee naprenat sin he nfuun to'is. Rarit Uisneno lin na re' nmate nrarin, of anmonin nfanin. Rarit sin, nok hit amoint ii, ta'ait ok atsaе teu nope, he hit ar-arkit tseun Usif Yesus In amneman naan. Rarit hit arkit atmoin tabubua piut tok Ne.✧

Hi mneen mirek-reko', natuin saa' re' au utoon ki sin re' ia, Uisneno neikn On na'uab sin. <sup>18</sup> Nok ranan naan, hi ro he mpaek noni' re' ia, he mmaha'tanin es nok es.

## 5

### *Mibarab he mseun Usif Yesus In amneman*

<sup>1</sup> Aok-bian arki! Hai kais amtui he mitoon meu ki mmak, Usi' In amneman naan, nateef jam fauk, ai' fuun ii ntaam neno fauk. <sup>2</sup> Natuin hi arki mihini mmak, In amneman naan nok askeken, on re' abakat re' antaam nabaak oras fai.✧ <sup>3</sup> Oras naan, of mansian ein anmonin nbin mamut ma tainina', mes nok askeken ate, sin napenin siraak. In amneman naan, nahuum on re' bifee ma'apu', nok askeken ate, meen mahoint ii ntea. Karu rasi naan anboor ate, hit he ttorak attein' ee on mee? On naan amsa', hit Usi' In amneemn ii, on re' naan.

<sup>4-6</sup> Aok-bian arki! Kais-kaisa' In amneman naan napein ki on re' abaakt ii ntaam neu umi nbi oras fai atnanas, nateef hi mtuup amfiin. Hi kais on re' naan! Hit ka tmoin fa et meis'ookn ii nanan, on re' biak ein re' antupan nfinin fe'.

---

✧ **4:15-17** 1 Korintus 15:51-52    ✧ **5:2** Nai' Mateos 24:43, Nai' Lukas 12:39, 2 Nai' Petrus 3:10

Natuin hit es re' atpirsai trair teu Nai' Yesus, atmoni trari tbi me'u, mibarab hi tuam ein naan he mseun Goe, ma mpanat mirek-reko' hi tuam ein naan. Rasin re' ia, hi mihini mrair sin. <sup>7</sup> Fin karu ttuup ate, ttuup oras fai. Ma tbukae raur mafu te, tbukae oras fai. <sup>8</sup> Mes hi kais on re' naan, natuain hit re' ia, tmoni trair tbi me'u. Hi ro he mpanat hi tuam ein naan. Karu hi mpirsai piut-piut meu Uisneno, ma mmaneek es nok es, naan on re' sorarus re' npaek baur besi re' npafa' naan in a'basan. Ma karu hi mharap ma mifnekan piut-piut meu Usif Yesus re' anpafa' ma npanat ki na'ko Uisneno In to'os, naan on re' sorarus re' na'sobe' 'soeb besi.✧

<sup>9</sup> Uisneno ka npiir kit fa he hit tapein In hukun. Mes In npiir ma nbeit kit he hit tapeni 'honis, natuain hit tpirsai teu Yesus Kristus, hit Usi'. <sup>10</sup> Fin In nmaet he nsenu' ma nseka' kit. Onaim karu In nkoen On anfain neem, hit of atmoin tok Ne nabar-baar, maski hit tmate trair, ai' tmoin fe'.✧  
<sup>11</sup> Nok rasi naan, ampaek au uabk ein re' ia, he mmafainekan ma mmahaan maun es nok es, on re' hi mmoe' je oras ahunut.

### *Nai' Paulus anfee noni' neu jema'at Tesalonika*

<sup>12</sup> Aok-bian arki! Mimnau he mhormaat sin aina'-ama' re' ntaman amepu krei he natuuk ki. Fin sin re' naan, anmepun ma'tani' neu ki, ma namnauba' ki he hi kais mistuun, mispae, ma mtaikoib. <sup>13</sup> Amfiit ma mbaab sin nok hi rais manekat, natuain sin nmepun ma'tani' neu ki. Ammoni mbi mamut ma rais rame' es nok es.

---

✧ 5:8 Nai' Yesaya 59:17, Efesus 6:13-17 ✧ 5:10 1 Tesalonika 4:13-18

<sup>14</sup> Aok-bian arki! Anmui' rasi bian fe' re' hai he mimnaub ki sin, on nai: tuaf-tuaf re' napehen, sero mpaesa' sin he sin nmepun batuur-batuur. Mee ja in neekn ee nabait, mha'tain je. Mee ja n'ore te, ampeis je. Rarit amneek amnaun meu too mfaun.

<sup>15</sup> Mimnau! Kais ambaras 'moe' amre'ut nok 'moe' amre'ut. Mibarab hi tuam ein naan he mmoe' rais reko meu are' too mfaun. Kais ammoe' reok goah meu hit aok-bian sin kuuk, mes meu tuaf bian amsa'.

<sup>16</sup> Mibarab hi neekm ein naan he mmarinan piut-piut. <sup>17</sup> Am'onen fai-manas. <sup>18</sup> Anmui' saa'-saa' aah, et susat ai' marinet, misaeb sukuur ma makasi meu Uisneno. Fin Uisneno anroim nok 'mo'et on re' naan neu sekau-sekau re' natuin Yesus Kristus.

<sup>19</sup> Kais am'eka' Uisneno In Asmaan ee In mepun. <sup>20</sup> Karu anmui' apirsait es nak, in napein hanaf na'ko Uisneno, kais mismeur ee! <sup>21</sup> Hi ro he mparikas mirek-reko' hanaf naan, he na' hi mihiin mak, batuur na'uu ma na'baa' na'ko Uisneno, ai' kaah? Karu batuur ate, mituin. <sup>22</sup> Mes mi'roba' hi tuam ein na'kon 'moe' amreu't ein ok-oke'.

### *Nai' Paulus natu'ub in surat*

<sup>23-24</sup> Au 'onen a'toit Uisneno he nakninu' hi neekm ein ma hi 'moinm ein ok-oke'. In es re' bisa nmoe' kit he hit tmoni tbi mamut ma rais rame' es nok es. Nok ranan naan, oras hit Usi' Yesus Kristus ankoen On anfain neem, na' hi bisa mhake mbi In human ma In matan, meik hi aom ein, hi neekm ein, ma hi smaanm ein, re' ka nmui' fa sanat saa'-saa'. Batuur! Natuin Usif Yesus In es re' no'en ma nnapen ki mjair In nonot-asar naan, In ka napoi fa. Saa' re' In

na'uab ee te, In nmoe' je ma njair. Rarit In neik ki mnao meu Uisneno In human ma In matan nok akrinu'.

<sup>25</sup> Aok-bian arki! Kais amnikan kai mbi hi onen.

<sup>26</sup> Au 'toit ki he mfee hai haan tabes ma manekat meu Uisneno In too srain ein et bare naan, joo!

<sup>27</sup> Au 'toit ki 'eik Usif Yesus In kanan, he mrees au surat re' ia meu jemaa't ein ok-oke'.

<sup>28</sup> Au 'toit he hit Usi' Yesus Kristus nakrira' In nekan arekot neu ki arki.

On re' naan, tua.

Saloom,

Au nai' Paulus kau, tua.

**Uisneno In Kabin ma Prenat: Rais Manba'an  
Fe'u nok Reta' Ahun-hunut  
Genesis and the New Testament in the Amarasi  
language of Indonesia  
Kejadian dan Perjanjian Baru dalam bahasa Amarasi  
dari**

copyright © 1999-2014 Unit Bahasa dan Budaya, Kupang NTT, Indonesia

Language: Amarasi

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-03-11

---

PDF generated using Haiola and XeLaTeX on 11 Nov 2022 from source files dated 30 Nov 2021

60603d94-9a14-5831-a729-e3ba7b0ebc25